

Carlo Tolazzi



Tarcisio Mizzau al à vinçût la edizion numar 35, indulà che a concorevin sedis lavôrs tra contis e romançs. Il parê dal president de jurie **Carlo Tolazzi**.

» DI CHRISTIAN ROMANINI

“Cui che al à voie di scrivi un romanç par furlan, nol à di vê la ‘presunzion de lenghe’ ven a stâi nol à di pensâ, cemût che masse dispès cualchidun al fâs, che al sedî sufficient doprâ la lenghe furlane par podê dî di vê scrit un bon romanç” e jere stade la raccomandazion che **Carlo Tolazzi**, component e za president de jurie dal premi leterari San Simon, al veve fat l’an passât. Lu vin contatât par comentâ i risultâts de edizion numar 35, che je stade celebrade come di tradizion ai 28 di Otubar.

Fevelin prin di dut dal vincidôr...

“Al à vinçût **Tarcisio Mizzau** cul romanç ‘Speriments di perfezion’. Al è une conte scrite ben, cun misure, che a puarte in se un messaç cundividût si pues dî di ducj, ma no simpri acetât, su la misure dal vivi”.

In gjenerâl cemût ise lade?

“E je lade ben, tignût cont de miserie dal an passât: 16 lavôrs, mieç e mieç tra contis e romançs. Une cualitât plui alte, ma il vizi di pensâ al furlan come un passepartout par vinci un premi mi pâr che si madra che ancjemò un pôc tal cjâf dai partecipants. Mi riferis a cualchidun dai finaliscj”.

O vês fat une anteprime cui 5 finaliscj...

“Sì, une des novitâts, no tant par stiçâ la curiositât de int, ma par dâ une vetrine ancje a cui che nol à vinçût. E ancje par simiotâ i premis plui preseâts (Campiello, Strega e v.i.). O sperî che si puedi continuâ a fâle ancje i agns che a vegin e che e diventi chê la vere serade dal premi. E po, chest an o vin za pronte la stampe dal libri vincidôr. Un sfuarç che il Comun di Codroip

Plui cualitât al San Simon

cun grande sensibilitât al à volût sostignî”.

Sono stâts risolti chei problemis organizatîfs che a jerin stâts? I ents i crodino inmò al San Simon?

“O jerin nô che o scomençava a crodi pôc al premi, nô de organizazion; e salacor un pôc ancje i scritôrs. Cussî o vin cirût di tacâ la atuazion di un progjet di rifonde dal concors che Franco Marchetta nus veve prontât, e in cheste direzion o provarin a movisi in avignî”.

Un to ricuart personâl di lui?

“O dîs dome che cence di lui, vuê il premi San Simon nol esistarès, o nol varès reson di esisti”.

Ce restial e ce vignaraial di cheste edizion?

“O sperî che al resti l’impat des novitâts: par zonte o organizarin cinc o sis seradis di letture ator pai Comuns là che o darin ancjemò visibilitât ai 5 finaliscj di chest an. Il San Simon al à di zirâ, di jessi presint ancje fûr dal moment des premiazioms”.

✉ ilfriuli@ilfriuli.it

■ CONFRONT

Regjon e Rai a vierzin la taule tecniche

La Regjon e à volût tornâ la vierzi cu la Rai la Taule tecniche, sede istituzionâl di confront permanent par svilupâ sinergjiis, par esempli sui temis des lenghis minoritariis e de proiezion internazionâl te Europe dal Est e dai Balcans”. Lu à afermât la presidente de Regjon, **Debora Serracchiani**, intun passaç dal sô intervent di di salût ae cunvigne inmaeade ai 16 di Otubar a Triest dal Corecom par une riflission in viste dai mudaments te uferte de Rai, dal gnûf asset organizatîf. La cunvigne e je stade ospitade te Aule dal Consei regionâl ae presince dal president **Franco Iacop**, che al à evidenziât come “al sedî propit just discuti di Servizi public indulà che si riunîs l’espression plui alte de comunitât”. Ancje Iacop al à fevelât des lenghis minoritariis tal sô intervent, marcant che “se di une bande la revision de spese e impon razionalizazioms, di chê altre la digjitalizazion e vierç gnûfs spaziis”.

SCOLTADIS DI DRIUS

Previsions

Le Rai regionâl e mande ogni matine les previsions dal timp pa l’aradio. Di Triest mancje nome che disin el numar di scarpis dal siôr ch’al fevele. I furlans e àn protestât. Cumò le Rai, soredut pe zone de Cjargne, e mandarà el “Bollettino dei naviganti”.

Euronews informa

Tal Numar Unic “Lignan” la identitât furlane e vierte al mont de plui impuartante localitât turistiche furlane

Al è stât presentât a palaç Belgrât, sede de Provincie di Udin, il numar Unic Lignan, la prestigjose opare monografiche par cure di Massimo Bortolotti publicade de Societât Filologjiche Furlane pal so 91esim Congrés, che si è tignût a Lignan ai 28 di Setembar. Al à vierzût l’incuintri il President de Provincie Pietro Fontanini ricuardant come la lungje tradizion dai numars unics de Filologjiche e rapresente une font autorevule pe cognossince di cetantis localitâts dal nestri Friûl. «Il Numar Unic su Lignan – al à comentât Fontanini – nus dâ la pussibilitât di scuvierzi che ancje la citât turistiche plui impuartante dal Friûl, che vie pal Istât e devente la plui frecuentade de region, ancje se “zovine” e à pardabon une storie interessante che e merte di jessi contade e fate cognossi. Un lavôr dificil, tacât l’an passât – al à ricuardât il Sindic di Lignan Luca Fanotto – cuant che la Aministrazion comunâl cun entusiasim e à fate buine la propueste de Societât Filologjiche di meti adun, pe prime volte te sô storie, il so Congrés a Lignan. Un lavôr rivât insom cu la presentazion dal numar unic ae comunitât lignanês tal Setembar passât intune “Terrazza a Mare” plene di int, une opare ancjemò in pîts dal moment che la intenzion dal



La monografie de Filologjiche presentade a Palaç Belgrât a Udin

Comun insiemit cu la Filologjiche e je chê di no limitâsi ae lenghe taliane e a chê furlane, ma di publicâ dentri dal an cualchi part de opare ancje par todesc e par inglês. Chest propit parcè che Lignan – al à spiegât il President de Societât Filologjiche Federico Vicario – e je tal stes timp citât furlane e internazionâl e, fuarte di cheste sô identitât, e vûl dreçâsi ancje ai turiscj che la frecuentin vie pe stagion estive. Al è dacuardi Vicario intal esprimi sodisfaziom par chest grant lavôr: Lignan si presente in doi volums di 1300 pagjinis in totâl cun cetantis fotografis e ilustrazioms a colôrs – che

al rapresente un moment impuartant di partecipazion e di condizion di bande de comunitât dai lignanês, di là de espression di afiet che ognidun di nô al à tai confronti de “citât des vacancis” par ecelence. Il ringraziament dal curadôr Massimo Bortolotti al è lâi ai chei passe 80 autôrs che a àn scrit e colaborât, studiant e analizant Lignan sot ducj i ponts di viste (ambientâl, storic, architetonic, urbanistic, turistic, sociâl), dant cussî la pussibilitât di presentâ un lavôr che si mostre tant che opare corâl e opera omnia. Un viaç di incjant te storie di Lignan al è stât proponût dal giornalista Paolo Medeossi inte sô presentazion, tacant de fondazion pôc plui di cent agns indaûr e rivant ae “dolce vita” lignanês dai agns Sessante cu la presince di atôrs e personaçs innoenâts dal pês di Alberto Sordi, Virna Lisi, Gino Bramieri, al mit di Hemingway, ai libris di Scerbanenco, ae invenzion urbanistiche particolâr di Pineda e forme di spirâl dal architêt Marcello D’Olivio. Un lavôr impuartant, che al merte di jessi let e cognossût e al permet di viodi Lignan no dome sot dal profil furlan, ma ancje turistic. Propit par promovî la sô difusion – al à precisât Fanotto – la Filologjiche e la Aministrazion comunâl a ufrissin ai citadins di Lignan la pussibilitât di comprâ il volum a un presit speciâl (informazioms li de Biblioteche di Lignan, Vie Treviso, 2 - telefon 0431.409160, pueste eletroniche: biblio@lignano.org).